



池北偶談

八

15
36
8



門 5
36
卷 8

池北偶談卷十八目錄

談藝九之八 凡三十八則

明宣宗畫

婦人畫

張登集

朝鮮採風錄

神韻

梅詩

周嬰卮言

常棣叶韻

中晚詩句

一鳴集

官銜

邵潛

沈嘉客

名媛詩

七子三獨夫

二王詩畫

王右丞詩

契丹大金二國志

曾 20
86
卷 8

池北偶談卷十八目

書庫

王義山詩

杜注

王承旨詩

盧延讓

慈恩塔詩

陶季

琉球二僧詩

詩三百非孔子所刪

敏速

石敬瑭家廟碑

東絹

魏野詩

鐵帆

徐曹詩

題壁逸詩

白洪厓

論坡谷

明史樂府

闔中詩

無羊之什

卷十八目畢

池北偶談卷十八

談藝

濟南王士禎阮亭著

高都姪廷掄簡菴較

明宣宗畫

予嘗見明宣宗畫黑猿一軸有御筆題云鎮守廣西都督山雲所進圖中一橫木猿臂挂其上不解何謂一日予門人常熟錢玉友良擇從粵東來云嶺外有黑猿犬不盈尺二臂相通寐則臂挂於橫木上一臂漸縮一臂漸長所謂通臂猿也乃知畫貴格物

婦人畫

近日婦人工畫者海寧李因是菴善畫松鷹及水墨花竹翎

毛江陰周禧善人物花鳥其妹祐與之頡頏義烏倪仁吉秀水黃媛介皆工山水木石桐城方維儀工白描大士

張登集

國史補稱張登小賦有織成隱起往往蹙金之狀撫言亦云如蹙金結繡而無痕迹王彥輔云曾在汴京相國寺得唐漳州刺史張登文集六卷權文公爲序云詩賦之外雜文合一百二十篇又云求居寄別懷人三賦與證相一篇意有所激鏘然王振然所得書肆鑲版裁六十六篇已亡其半彥輔欲續姚鉉文粹錄登之文不果惜也

朝鮮採風錄

康熙十七年命一等待衛狼暉頌 孝昭皇后尊諡於朝鮮

因令采東國詩歸奏吳人孫致彌副行撰朝鮮採風錄皆近體詩也今擇其可誦者粗載於此林悌詩十五越溪女羞人無語別歸來揜重門泣向梨花月閨怨羸驂馱倦客日暮發黃

州可惜踏青節未登浮碧樓佳人金縷曲江水木蘭舟寂寂

生陽館孤燈夜似秋中和道中白光勳詩秋草前朝寺殘碑學士

文千年自流水落日見孤雲弘景廢寺偶因休浣到沙門把酒題

詩古寺存紅藕一池風滿院亂蟬千樹雨連村深慚皓首從

羈宦猶喜青山似故園聞說錦湖煙景異何時歸棹問真源

奉恩寺吳時鳳詩地卽黃岡勝官如玉局閑居然小雪日喚作

此堂顏小雪堂金宏弼詩處獨居閑絕往還只呼明月照清寒

憑君莫話生涯事萬頃煙波數疊山書懷趙昱詩十年長揜故

山扉塵土東華幾染衣想得鑑湖春夜月子規應喚不如歸

贈鑑湖主人 姜克誠詩江日曉未生蒼茫千里霧但聞柔櫓聲不

見舟行處湖堂 鄭碣詩遠遠沙上人初疑雙白鷺臨風忽橫

笛廖亮江天暮閣 成運詩江觸春樓走天和雪嶺圍雲從詩

筆染烏拂酒筵飛浮海知今是趨名悟昨非松風當夕起蕭

颯動荷衣竹西樓 白光勉詩旅泊依村日重遊屬暮年鐘聲隔

岸寺人語渡湖船月上蒹葭遠煙橫島嶼連夜深風更急落

雁不成眠縣津晚泊 金宗直詩偶到仙槎寺巖空松桂秋鸚翻羅

代蓋龍蹴佛天幽細雨僧縫衲寒江客艤舟孤雲書帶草獵

獵滿池頭仙槎寺 爲訪招提境松間紫翠重青山半邊雨落日

上方鐘語共居僧軟杯隨客意濃頽然一榻上相對鬢蓬鬆

佛國寺 奇邁詩南山松柏幽北山煙霧深遊子暮何之庭樹生

秋陰歸雲向遙岑宿鳥棲前林幽懷杳不極清風吹我襟直

懷鄭道傳詩曉日出海東直照孤島中夫子一片心正與此

日同相去曠千載嗚呼感予衷毛髮豎如竹凜凜吹英風嗚呼

島弔田橫 魚無迹詩馬上逢新雪孤城欲閉時漸能消酒力渾欲

凍吟髭落日無畱景栖禽不定枝灞橋驢背興應與故人期

逢 權應仁詩結屋倚青嶂攜瓶盛碧溪徑因穿竹細籬爲見

山低枕石巾粘蘚栽花屐印泥繁華夢不到閑味在幽栖山

趙希逸詩春寒料峭酒微醒羈宦連年恨不平燈暗小牕聞

馬鬣夢回孤枕數鷄鳴祇憑吾友論交道欲向何人說世情

已判此身同許國與君終始寸心明次延賢都郵韻 鴨水西邊是漢

關天局地鑄限重灣荒煙亂磧麟州戍落日孤雲馬耳山風
定空江波激激雪消春郭溷潺潺思家未得平安字歸思惟
應夢往還龍灣偶成金塗詩楊花落盡草萋萋楚客傷離思轉悽
佳節一年寒食過亂山千疊子規啼虞翻去國身全老王粲
登樓賦漫題想得天涯回白首昭陽江上夕陽低寄李達詩
二妃昔追帝南奔湘水間有淚寄湘竹至今湘竹斑雲深九
疑廟日落蒼梧山餘恨在江水滔滔去不還班竹怨鄭士龍詩
隨意攤書坐孤吟對晚暉岸風帆腹飽洲雨荻芽肥籬缺通
江色簾垂礙燕飛誰知采蘭節和病試春衣釋悶鄭之升詩細
草閑花水上亭綠楊如畫掩春城無人爲唱陽關曲獨有青
山送我行雷別崔慶昌詩危石纒交一徑通白雲千古秘仙踪

橋南橋北無人問落木寒流萬壑同

武陵溪

水岸依依楊柳多

小船遙聽采蓮歌紅衣落盡秋風起日暮芳洲生白波

采蓮曲

柳永吉詩落葉鳴廊夜雨懸佛燈明滅客無眠仙山一躡傷
遲暮烏帽欺人二十年福泉寺金質忠詩常苦愁腸日九迴忽

驚啼鳥報春來三年藥物人猶病一夜雨聲花盡開世事紛

紛難自了天機袞袞遙相催平生久負凌雲氣怙悵如今半

已摧

病出湖堂

林億齡詩寂寞荒村隱少微蕭條石徑接柴扉身

同流水世間出夢作白鷗江上飛山擁客牕雲入座雨侵書

榻葉投幃飄然又作抽簪計塵土何由化素衣送友還山崔壽城

詩老猿失其羣落日古槎上兀坐首不回想聽千山響題金

淨詩江南殘夢日慊慊愁逐年華日日添雙燕來時春欲暮

杏花微雨下重簾

江南春思

鄭知常詩桃花紅雨燕呢喃繞屋春

山間翠嵐一頂烏紗慵不整醉眠花塢夢江南

醉後

僕遜詩一

夜山中雨風吹屋上茅不知溪水長祇覺釣船高

山中

李植

詩春風急水下輕艫朝發驪陽暮漢江篙子熟眠雙櫂靜青

山無數過船牕

泊漢江

權遇詩衙罷乘閑出郭西殘僧古寺路

高低祭壇畔春風早紅杏半開山鳥啼

竹長寺

許筠詩重簾

隱映日西斜小院回廊曲曲遮疑是趙昌新畫就竹間雙鶴

坐秋花

晚咏

朴瀾題平壤館壁西京古蹟詩三十首遺田儀曹

其六云檀下神人始此都至今遺廟古城隅不知當日阿斯

達亦有攀髯墮者無一太師杖軼筆猶存舊事鴻濛未足言

惟有青山三尺墓東人須與孔林論二周家井制出鄒賢猶

是其詳不得傳試向含毬門外望平郊十里是商田二丹絡

元非赤土宜清泉何事洞中逵鹿盧汲取瓊漿飲千載令人

說太師

四

高句驪起漢鴻嘉宮殿遺墟草樹遮怙悵乙支文

德死國亡非爲後庭花

五

朝天片石出江溇麟窟苔封草樹

深怙悵天孫何處去野棠花發古祠陰

六

又送詔使還京師

詩序并載於左

皇上紀元之十七年戊午上駟武備二

大人頌

大行皇后諡於下國時則不佞謬膺寡君僨命之

托馳逐龍灣因護其行抵王京二大人傳宣帝命以寡君

有疾停郊迎儀前度使臣之回奏也小邦君臣且感且悸惟

是飲冰之行莫肯虛徐請少畱而不可得時值大歉公私未

立始不能備供億之禮二大人加盡傷一革浮費所索者

惟詩文與書法而已寡君命朝紳或製或寫以應橐中所齎
蕭然若寒士前此所未有也武備公仍將 兩朝宸翰示不
佞暨都監諸官其書曰正大光明者卽 先皇帝筆
今皇帝手書跋尾者也其曰清慎勤 今皇帝筆也生龍
活蛟之蜿蜒銀鈎鐵畫之勁健真可以參造化驚風雨跋語
珠光玉潔自有不可掩之華蓋公世懋勳庸錫予蕃庶最以
此珍玩不以出疆而舍之云海外鯁生非蒙天使眷顧則亦
何途之從而獲此大觀也哉自臨境至回旆首尾四十有二
日不佞又伴至鴨綠江上大人徵詩若序要作他日不忘之
資顧不佞素短於章句重以筮仕數十載勞攘簿書拋棄翰
墨自慙不足以副大人之勤敏也辭之益固命之益懇因略

敘其槩兼呈篇什以供一粲云爾詩五言十韻有云紙上風
雷隱毫端造化奇城路風旌掣滄江鼓角悲云伴送使資憲
大夫行司憲府大司憲兼成均館大司成廣州後人歸巖李

元楨致彌後登戊辰
進士改庶吉士

神韻

汾陽孔文谷天云詩以達性然須清遠爲尚薛西原論詩獨
取謝康樂王摩詰孟浩然韋應物言白雲抱幽石綠篠媚清
漣清也表靈物莫賞蘊真誰爲傳遠也何必絲與竹山水有
清音景昃鳴禽集水木湛清華清遠兼之也總其妙在神韻
矣神韻二字予向論詩首爲學人拈出不知先見於此

梅詩

宋梅聖俞初變西崑之體予每與施愚山侍讀言及宛陵集施輒不應蓋意不滿梅詩也一日予曰扁舟洞庭去落日松江宿此誰語愚山曰韋蘇州劉文房耶予曰乃公鄉人梅聖俞也愚山爲爽然久之

周嬰卮言

周嬰字方叔莆田人撰卮林十卷援據該博偶記其數條可資詩話者如石尤風引元相詩罔象睚眦頻逞怪石尤翻動忽成災義山古意詩去夢隨川後來風竚石郵以石郵對川后蓋奇相飛廉之屬○又古咄咄歌棗適今日賜誰當仰視之引方言云賜盡也潘岳西征賦若循環之無賜維摩詰經如來鉢飯悉飽衆會猶故不賜太平廣記引啓顏錄山東人

謂盡爲賜是也又光明經食已飽足飯不消渴渴與賜同予按集韻賜盡也見釋典渴洩水門南史有石渴行山詩應思石渴訪春泉石渴清心胸不云盡義○又楊用修曰唐人云君苗無姓宛委餘編曰君苗姓應瑒之從弟見文選注非也按陸雲與兄平原書云前作登臺賦極未能成而崔君苗作之又云君苗作愁霖賦極佳見兄文輒云欲燒筆研曹志苗之婦公其婦與兒皆能作文頃借其釋詢二十七卷當百餘紙寫之則君苗清河族也休璉與二陸相距且百年其從弟安得尚存復修少年鉛槧事耶○又高似孫緯略金樓子云劉子玄爲水仙花賦時人謂不減洛神予固不敢望知幾云按金樓子者梁元帝也劉子玄知幾也知幾在證聖中作史

通二十卷後以名類立宗改名子立在元帝後百餘年矣御覽引金樓子云劉休立爲水仙賦云是南宋南平王鑠也水仙乃水上神女陶弘景亦有賦高氏以休立爲子立以水仙爲花名豈不謬歟此類數十條皆足解頤胡元瑞陳晦伯作正楊筆叢等書以駁用修方叔作廣陳諗胡尤爲楊氏功臣予按以休立爲子立正如書家以劉德升爲景升也

常棣叶韻

詩常棣兄弟鬩于墻外禦其侮每有良朋然也無戎劉原父七經小傳云戎疑當作戍戍亦禦也吳才老補音云務字古人讀作蒙疑侮當作零以叶戎童子問載朱子云戎汝二字古人通用是叶音汝也如南仲太祖太師皇父整我六師以

修我戎亦叶汝也予按三說當以原父爲長

中晚詩句

北齊房君豹有山池在歷城叅軍尹孝逸將還鄴詞人餞宿於此自爲詩曰風淪歷城水月倚華山樹時人以比謝氏此自北齊詩詩紀未采詩藪誤作中唐且訛華山爲華陽方叔正之是矣至云猿啼洞庭樹人在水蘭舟句格近六朝而方叔疵之謂是晚唐面目則謬甚吳郡皇甫少玄百泉兄弟論詩以此二語爲五言極則藝苑流傳焉可誣也

一鳴集

唐司空圖一鳴集十卷雜著八卷碑版二卷前有自序云所撰密史別編又有絕鱗集述亦其自著也其與王駕論詩曰

國初雅風特盛沈宋始興之後傑出於江寧宏肆於李杜右丞蘇州趣味澄夏如清沈之貫達大曆十數公抑又其次元白力勅而氣孱乃都市豪估耳又與李生論詩曰江嶺之南凡是資於適口者若醯非不酸也止於酸而已若醢非不鹹也止於鹹而已酸鹹之外醇美者有所乏耳王右丞韋蘇州澄澹精緻格在其中豈妨於適舉哉晚唐詩以表聖爲冠觀此二書持論可見其所詣矣

官銜

官銜二字習俗相沿不識其義家語禮運篇云官有銜職有序注銜治也執轡篇云古之銜天下者以六官總治焉故曰銜四馬者執六轡銜天下者正六官官銜之義本此封氏聞

見記云銓曹聞奏之時先書舊官品於前次書擬官於後使新舊相銜不斷如人口銜物又如馬之有銜以制其首古人謂銜尾相屬卽其義也此臆說殊無所據

邵潛

邵潛字潛夫自號五岳外臣南通州人性傲僻不諧俗好嫚罵人人多惡之及與李本寧鄒彥吉黃貞父陳仲醇諸公遊所著友誼錄循吏傳印史諸書多可傳者年五十無子娶後妻成久之嫌其貧老棄去一婢又爲勢豪所奪遂隻身客如臯城西門年八十矣康熙乙巳予過臯訪之茅屋三間黝黑如漆邵筋骨如鐵白髮鬢鬢被領雙眸炯然具果菽畱予飲尚盡數觴與修禊冒氏洗鉢池尚能與予輩賦詩陳其在

維崧

云古今文人多窮然未有如邵先生者聽其言愴然如劉孝
標所自序也予去廣陵聞邵卽以是歲下世矣

沈嘉客

沈嘉客字無謀河間故城人居鄭口性孤迥有潔癖與德州
盧德水侍御世臨清汪未大孝廉大交好以詩相倡和於吳
交姚孟長希楊子常彝顧麟士夢於梁交吳讓伯伯徐霖蒼
作霖與容城孫鍾元奇尤善中年作閉關疏送客不出籬落一
畝之宮花竹清深圖書充牣縣令至必式廬復其徭役年八
十餘乃卒予嘗愛其一絕云淮南作客逢春雨破帽疲驢幾
日程六合城南呼舴艋綠陰相送到南京

名媛詩

周嬰方叔極稱辨博然有不必辨者如詮鍾辨文明太后青
臺雀歌杜蘭香贈張碩詩數條不知名媛詩歸乃吳下人偽
託鍾譚名字非真出二公之手何足深辨又向來坊間有明
詩歸更俚鄙可笑亦託名竟陵又足辨耶○坊刻又有皇明
通紀亦託名鍾惺內載左都御史曹思誠爲魏忠賢建祠事
曹近刊宛揭云與惺素無仇怨惺何不自惺等語不知惺歿
於天啓乙丑而坊賈偽託之也曹氏遍愬京師與鍾爲難可
發一笑此康熙二十年事去鍾之歿已五十七年矣

七子三獨夫

陸機五等諸侯論六臣犯其弱綱七子衝其漏網呂向注七
子謂吳王濞七國劉更生傳春秋地震爲在位執政太盛也

不爲三獨夫動亦明矣師古曰獨夫猶言匹夫也七子三獨夫皆奇文

二王詩畫

金陵王桀字安節善畫山水其兄著字宓草工花卉翎毛兄弟皆能詩往往可誦著本名尸桀本名丐後改今名嘗見桀兩篇云虛牕吮筆臨秋水葭菼蒼蒼冷到天爲愛芙蓉江月好小亭長伴鷺絲眠又潯陽江水抱城流庾亮曾經此夜遊亦是新涼當八月遂教高會擅千秋風騷接席無今古喬梓凌雲富唱酬傑閣共傳詩句好飛揚興不減南樓桀詩人方文爾止壻也

王右丞詩

世謂王右丞畫雪中芭蕉其詩亦然如九江楓樹幾回青一片揚州五湖日下連用蘭陵鎮富春郭石頭城諸地名皆寥遠不相屬大抵古人詩畫只取興會神到若刻舟緣木求之失其指矣

契丹大金二國志

契丹國志二十七卷宋淳熙七年祕書丞葉隆禮奉詔撰進其書帝紀十二卷后妃諸王外戚傳三卷列傳四卷石晉降表宋澶淵誓書關南誓書議割地界書共一卷南北朝饋獻禮物外國貢獻一卷四京州縣沿革一卷風俗官制科舉等一卷王沂公富鄭公行程錄一卷張舜民使北記等一卷諸番雜記歲時雜記二卷又大金國志四十卷宋端平元年仿

西歸正人改授承事郎工部架閣宇文懋昭上其書帝紀二十六卷開國功臣一卷文學二卷張邦昌錄一卷劉豫錄一卷立僞楚僞齊冊文宋宗室隨二帝北狩一卷兩京制度陵廟儀衛官制科舉兵制等四卷兩國誓書一卷京府州縣一卷初興風俗一卷許亢宗行程錄一卷金志記載與南遷錄多相合與史多謬其文學傳則全節取元好問中州集或云宋人僞造似也契丹志簡淨可觀金志則仿其書而爲之者耳

王義山詩

予■謂劉後村詩好用本朝人事近見宋末王義山稼村集效龔尤可厭如爭道老泉生二秀最難錦水又三劉師魯僅

存遺集在樂天無限故人思田園彭澤菊三逕意思濂溪草一般上帝遣符徵范鎮斯民失怙哭溫公梅花牕下叅同契綠草庭前太極圖榜文爭看乖崖押士類歡呼常袞來無已許令叅後社庭堅端的是前身有時覓句尋歐約不慣斟羔學党家此真下劣詩魔惡道全出矣宋末如王義山何夢桂之流酸腐庸下而詩文獨傳至今文之傳不傳信有命耶

杜注

錢牧齋注杜王宋紹興吳若季海本若自序云凡稱樊者樊冕小集也稱晉者開運二年官書也稱荆者王介甫四選也稱宋者宋景文也稱陳者陳無已也稱荆及一作者黃魯直冕以道諸本也又宋胡仔茗溪漁隱云子美集予所見者凡

八家杜工部小集則潤州刺史樊晃所序也注杜工部集則
內翰王原叔洙所注也吳彥高集云是元祐間祕閣校對
黃本鄧忠臣慎思所注託名原叔
正王內翰注則王寧祖也補注杜工部集則學士薛夢符也
校定杜工部集則黃長睿伯思也重編少陵先生集并正異
則東萊蔡興宗也注杜詩補遺正謬集則城南杜田也少陵
詩譜則縉雲鮑彪也

王承旨詩

宋刻鑿戒錄載前蜀興聖太子隨軍王承旨失其名詠後主出
降詩云蜀朝昏主出降時銜壁牽羊倒繫旗二十萬軍齊拱
手更無一箇是男兒此與花藥夫人詩大同小異必有一誤
此詩能改齋漫
錄亦兩載之

盧延讓

何光遠鑿戒錄載王蜀盧侍郎延讓獻王建詩卷中有栗爆
燒瓊破猫跳觸鼎翻之句後建與潘峭在內殿平章邊事令
宮人於爐中煨栗栗爆出燒損繡褥子建多疑每於爐中燒
金鼎子惟徐妃二妹妹侍茶湯而已是夜宮猫誤觸鼎翻建
曰栗爆燒瓊破猫跳觸鼎翻憶延讓詩有此一聯先輩裁詩
信無虛境來日遂有六行之拜自給事
拜工部以俚鄙之詞遂獲顯
擢與孟公松月夜牕虛迥異如此人生窮通豈非命乎或云
是盧延遜獻宋太宗詩潘峭作潘美

慈恩塔詩

元白因傳香於慈恩寺塔下忽覩章先輩八元詩吟咏竟日

悉令除去諸家之詩惟畱章作其五六句云迴梯暗踏如穿
洞絕頂初攀似出籠殊不成語不知元白何以心折如此盛
唐高岑子美諸公同登慈恩寺塔賦詩或云秋色從東來蒼
然滿關中五陵北原上萬古青濛濛岑或云秋風昨夜至秦
塞多清曠千里何蒼蒼五陵鬱相望高或云秦山忽破碎涇
渭不可求俯視但一氣焉能辨皇州杜此是何等氣槩視章
作真小兒號嘍耳每思高岑杜輩同登慈恩塔高李杜輩同
登吹臺一時大敵旗鼓相當恨不廁身其間爲執鞭弭之役

陶季

寶應布衣陶澂字季一字昭萬有著舟車集予爲刪定其客
湖南閩中諸詩多似高岑龍標今日一作手也過東阿曹子

建墓有句云可憐衰草地猶是建安人爲時所稱

琉球二僧詩

琉球天王寺有僧號瘦梅道人賦七夕詩云陶公簾外亦龍
下漢武殿前青鳥來又萬松院僧不羈有詩云黃葉落三經
白雲歸數峯予門人汪翰林舟次楫林舍人石來麟康熙癸
亥奉使其國見之石來有詩云瘦梅道者人不識梵夾吟題
聳兩肩賦得赤龍青鳥句樊南甲乙可同傳浮屠亦有不羈
人祇樹蕭蕭絕世塵唐體詩中風格好白雲黃葉鬪清新

詩三百非孔子所刪

孔子但正樂使各得其所而已未嘗刪詩觀自衛返魯云可
見且一則曰詩三百再則曰誦詩三百家語對哀公問郊亦

日臣聞誦詩三百不可以一獻知古詩本來有三百篇非孔氏自刪定也又左傳列國卿大夫燕饗賦詩率皆三百篇中之詩多在孔氏之前其非夫子手刪了然可見葉水心習學記言云史記言古詩三千孔安國亦言刪詩爲三百篇按詩周及諸侯用爲樂章今載於左氏者皆史官先所采定就有逸詩殊少矣不待孔子而後刪十取一也論語稱詩三百本謂古人已具之詩不應指其自刪者言之也輔廣亦謂司馬遷言古詩三千傳聞之誤其說與予見略同

敏速

南唐近事載處士史虛白嘗對客奕旁令學徒四五輩各秉紙筆先定題目隨口而書略不停綴歎食之間衆製皆就封

氏聞見記雒縣尉張陟在中書日試萬言令善書者三十人各操紙執筆俱占題目身自巡席依題口授周而復始午後詩筆俱成得七千餘字唐詩紀事長沙王璘日試萬言崔詹事廉問表薦於朝先試之璘請十吏皆給筆札璘口授十吏筆不停綴首題黃河賦三千字復爲烏散餘花落詩二十首皆可謂敏速矣又韋臯嘗於二十四化設醮請符載撰齋詞於時飲摩訶池上載命小吏十二人捧硯人分兩題緩步池間各授口占其敏如此

石敬瑭家廟碑

朱簡討云曾於廟市見五代石敬瑭家廟碑梁周翰撰文翰雖不甚工亦是古物惜未購之此碑石今不知所在

東絹

蜀鹽亭縣有鵝溪縣出絹謂之鵝溪絹亦名東絹子美詩我有一疋好東絹是也周紫芝詩百尺寒松老幹枯韋郎筆妙古今無何如莫掃鵝溪絹畱取天吳紫鳳圖此雖諧謔然北征自作於赴行在時而題韋偃畫松則在入蜀之後固不可同日語也

魏野詩

宋小說載魏野同寇萊公遊陝郊某寺詩云若得時將紅袖拂也應勝似碧紗籠湘山野錄云添蘇長安名姬也孫僅尹京兆日野寄詩云見說添蘇亞蘇小隨軒應是珮珊珊孫愛之以示添蘇喜如獲寶求善筆札者大署其詩於壁野以事

抵長安孫邀置府宅人未之知也有好事者與密過添蘇家見其風貌魯質固不前席野忽舉頭見壁所題乃索筆於側別紀一絕云誰人把我狂詩句寫向添蘇繡戶中閑暇若將紅袖拂還應勝得碧紗籠添蘇始知是野大加禮敬二說不同

鐵帆

僧鐵帆能詩順治末予官揚州鐵帆住木蘭寺劉吏部公敵體聞之寄予書云是天寒衣衲重鐵帆耶天寒衣衲重乃粵僧一靈句公敵誤記耳東坡在黃日參寥往視之京師士大夫寄書云聞有僧在彼是隔林彷彿聞機杼和尚耶坡笑語參寥云此是吾師七字號公敵帖全用此語

徐曹詩

徐禎卿洞庭葉未下瀟湘秋欲生一篇非太白不能作千古
絕調也曹學佺亦有秦淮送別一篇云疎籬豆花雨遠水荻
蘆煙忽弄月中笛欲開江上船情致殆不減徐徐五集中有
一絕云渺渺太湖秋水闊扁舟搖動碧琉璃松陵不隔東南
望楓落寒塘露酒旗曹一絕可以相敵新林浦云夾岸人家
映柳條玄暉遺跡草蕭蕭曾為一夜青山客未得無情過板
橋

題壁逸詩

予少時與先兄考功同上公車每到驛亭輒題素壁筆墨狼
藉率不存稿逸去多矣數年來往往從友人口中得之恍忽

如夢不忍盡割略記於此河口花明錦纜春砑繚綾子領邊

巾不知何事牽儂思欲疊紅箋賦洛神徐隱君東癡嘗口誦此詩不見湘

中舊汜人西園蘭石愴如新低個十五年前句祇有蛛絲絡

暗塵彭少宰孫適羨門誦之關河連夜雨驛路一聲蟬湯右曾西屋王

風迴邸閣聞鈴馱日落關山見戍旗彷彿夢中尋蜀道打包

身度棧雲西徐學士健菴誦之且題其右云古驛斜陽聽鐸聲分明棧路蜀山行讀君題句成先識天遣才

人過錦城往迹流傳本事詩廿年如夢不堪思重來頭白風情盡

誰記巡檐繞柱時汪耀麟叔定誦之趙北燕南水四圍此中避地可

忘機垂垂芡實迎秋熟拍拍鷗羣接翅飛蟹舍都連黃篾舫

釣人相映綠蓑衣淮南小別今三載魚稻珠湖願竟違曹祭酒禾

蛾嶂榜旅舍日漁洋詩屋

先世父侍御公崇禎中巡視茶馬作西巡雜詩數十首有云
不須赤打白洪厓予幼誦之不解爲何語頃見丁謂戲白積
詩云五百青蚨兩家缺赤洪厓打白洪厓蓋用此

白洪厓

論坡谷

許彥周詩話云東坡詩不可輕議詞源如長江大河飄沙卷
沫枯槎束薪蘭舟繡鷁皆隨流矣珍泉幽澗澄潭靈沼無一
點塵滓只是體不似江河耳林艾軒論蘇黃云譬如丈夫見
客大踏步便出去若女子便有許多粧裹此坡谷之別也

明史樂府

長洲尤展成侗晚以博學宏詞入史館在局中仿李西涯體

作明史樂府百篇佳處殆不減李今略載數首於此作佳傳
云入學宮辭孔子衣帶題詩自經死出史局別同官官方餉
豬不暇看一死一生交情見畱與若翁作佳傳閣門使云閣
門使鐵簡賜谷長史兼理六王事當局不敢讓臣誼應如是
殿下百世後難逃一箇字下詔獄徽髮死嗟乎此真文成子
張辟彊豚犬耳生程濟云爲忠臣爲智士死高翔生程濟身
免乎軍中祭君免乎宮中剝君乘車臣執轡君登舟臣操柁
寒則燎衣飢持糒四海從亡多故人道旁相見惟流涕萬水
千山風復雨送君還上金陵去天外龍蛇有日歸鴻飛冥冥
不知處靖難云七國反誅家令灌將軍出山東定北平起討
齊黃曹國公出金陵亡建文君非景帝燕王亦非吳王凜靖

難雖然百戰功成敗何常總天意太祖生男二十五爲王爲
庶知誰主燕子高飛上帝畿紇干凍雀無毛羽可憐高煦亦
英雄頃刻燒死銅缸中威武大將軍云平陽侯張公子威武
大將軍三君一轍耳漢家天子自待邊大同宣府往復還朕
稱將軍封萬戶驃騎當屬江與錢旌旗獵獵向北駐樓船搖
搖望南渡豹房家裏樂未終更覓春江花月處朝登牛首山
夕宿鳳皇臺鄱陽凱歌何雄哉戎服簪花金銀牌揚鞭却指
隋堤笑一狩江都竟不回大禮云明倫典問誰作唱者璵和
者萼筆者方削者霍浹與綰唯且諾天子有私臣朝中皆黨
人武夫何知咄郭勛配爾祖英烈傳中山騁貽開平歎根本
彗云根本彗腹心彗門庭彗羣妖掃地偷龍睡彗未退兮孛

將至大馮君小馮君忠臣孝子出一門刺血上書動至尊但
看六月飛霜雪君門之彗乃可滅河套冤云嚴夏兩家鷄相
鬪會銑仇鸞分左右嚴鷄方勝夏鷄孤銑欲劾鸞胡爲乎套
未復身先死朝璽書暮西市將軍橫尸何足言宰相駢首寧
無冤君莫哭君不見朱仙鎮上風波獄長生藥云五利戮文
成死致一真人上天去復有紫府神霄兩高士天子齋居日
夜禱祠相公宿直爭獻青詞赭衣半道斷首滿稽殺人媚天
修立奚爲四十五年元氣削王金方進長生藥海瑞疏云世
宗在位四十五建言諸臣盡園土末年乃有海瑞疏直訐乘
輿干上怒擲地不已遶殿步忠臣豈肯逃亡去大行賓天應
釋汝獄吏酒肴相勞苦但願飽啖得死所誰知晏駕驚聞訃


此日方看臣哭主當時尚擬子罵父逐新鄭云華亭去分宜
江陵逐新鄭賢否故懸殊門戶總同釁主少國疑賴元老一
畱一去由馮保宰相踉蹌出午門先皇顧命寒秋草大臣獄
起重驚倒不憐身歿無遺表夫人泣涕致相公敬爲故夫獻
微寶富貴何常忽易人江陵簿錄還如掃噫嘻乎前人跌後
人滑古來名位多相軋死姚崇算生張說趙高傳云委鬼當
頭坐茄花滿地紅趙嬈曹節竟私通涿州道上馬游龍月華
門前車鬪風內操撾鼓鳴刀弓犴狴流血朝班空祠堂昭德
兼崇功乾兒義子多如蟲讀史至此再三歎殆哉岌岌將作
難滿朝彈章君不見中宮獨看趙高傳

闡中詩

淄川袁孝廉松籬潘名士也以康熙癸卯冠禮經壬戌尚困
公車闡中賦詩云二十年前古戰場臥聽譙鼓夜茫茫二條
畫燭連心熱一徑寒風透骨涼苦向緇塵埋鬢髮憑誰青眼
託文章明宵別後長安月偏照河橋柳萬行武康陳孝廉與
公之羣吟之至泣下是科袁竟下第乙丑病蠱卒

無羊之什

詩國風如燕燕蒹葭幽風東山七月諸篇述情賦景如化工
之肖物卽如小雅無羊之什云或降於阿或飲於池或寢或
訛爾牧來思何蓑何笠或負其餼麾之以肱畢來旣升卽使
史道碩戴嵩畫手擅場未能至此後人如何著筆



池北偶談卷十九目錄



談藝九之九 凡四十一則

宋人絕句

蘇祠注

胡恢書

僧作制義

孟子逸語

法言語

瓏璣

荀子語

船

劉李

詩僧

詔語似詩

螭棋集

肅府淳化帖

進西岳賦表

蔡狀元詩

指掌圖

羅鄂州

二內禪頌

避諱當改正

西施

相鼠鼯鼠

蜀恙泥妍媸

魏南陽

鄜鄮

呂太一

王萃

月泉吟社

谷音

韋蘇州

夢山詩

黃夫人詩

險糜

孫豹人詩

遼宮詞

平陵城

中南草堂圖

游王琴

焦山鼎詩

誌公碑

米太僕研山

卷十九目畢

池北偶談卷十九

談藝

濟南王士禎阮亭著 高都姪廷掄簡菴較

宋人絕句

偶爲朱錫鬯太史尊舉宋人絕句可追踪唐賢者得數十首
 聊記於此亭亭畫舸繫春潭只待行人酒半酣不管煙波與
 風雨載將離恨過江南春陰垂野草青青時有幽花一樹明
 晚泊孤舟古祠下滿川風雨看潮生冷於陂水淡於秋遠陌
 初窮見渡頭賴是丹青無畫處畫成應遣一生愁竹外桃花
 三兩枝春江水暖鴨先知蘆蒿滿地蘆芽短正是河豚欲上
 時黃葉西陂水漫流籊籊風急滯扁舟夕陽暝色來千里人

語鷄聲共一丘露白霜紅郭外田山濃水淡欲寒天參軍抱
病陪清賞一檝呼歸亦可憐斷腸聲裏無形影畫出無聲亦
斷腸想得陽關更西路北風低草見牛羊梁州一曲當時事
記得曾拈玉笛吹端正樓空春晝永小桃猶學澹燕支斷雲
一葉洞庭帆玉破鱸魚霜破柑好作新詩寄桑苧垂虹秋色
滿東南投荒萬死髡毛斑生入瞿唐灑灑關未到江南先一
笑岳陽樓上對君山江上荒城猿鳥悲隔江便是屈原祠一
千五百年間事只有灘聲似舊時夜雨連明春水生嬌雲濃
暖弄微晴簾虛日薄花竹靜時有乳鳩相對鳴目盡孤鴻落
照邊遙知風雨不同川此中有句無人見送與襄陽孟浩然
獨凭危堞望蒼梧落日君山似畫圖無數柳花飛滿岸晚風

吹過洞庭湖來時秋雨滿江樓歸日春風度客舟回首荆南
天一角月明吹笛下揚州梨花淡白柳深青柳絮飛時花滿
城悵悵西關一株雪人生看得幾清明到處相逢是偶然夢
中相對兩華顛還來共醉西湖雨不見跳珠十五年烏塘渺
渺路平堤堤上行人各有攜試問春風何處好辛夷如雪柘
岡西掃地焚香閉閣眠簾紋如水帳如煙客來夢覺知何處
挂起西牕浪接天曾作金陵爛熳遊北歸塵土變衣裘菱荷
聲裏孤舟雨臥入江南第一州皂莢村南三四里春江不隔
一程遙雙堤鬪起如牛角知是隋家萬里橋去年此日泊瓜
洲衰柳蕭蕭客繫舟白髮天涯歎流落今宵聽雨古宣州山
驛蕭條酒倦傾嘉陵相背去無情臨流未忍輕相別吟聽潺

溪坐到明照江丹葉一林霜折得黃花更斷腸商略此時須
痛飲細腰宮畔過重陽洞庭木落萬波秋說與南人亦自愁
欲指吳淞何處是一行征雁海山頭陌上花開蝴蝶飛江山
猶是昔人非遺民幾度垂垂老遊女還歌緩緩歸白髮先朝
舊史官風爐煮茗暮江寒蒼龍不復從天下拭淚看君小鳳
團濯錦江邊憶舊遊纏頭百萬醉青樓而今莫索梅花笑古
驛燈前各自愁濟南春好雪初晴行到龍山馬足輕使君莫
忘雪溪女時作陽關腸斷聲琵琶絃急滾梁州羯鼓聲高舞
臂鞦破費八姨三百萬大唐天子要纏頭逍遙堂後千章木
常送中宵風雨聲誤喜對牀尋舊約不知漂泊在彭城秋來
東閣涼如水客去山公醉似泥困臥北牕呼不醒風吹松竹

雨淒淒千詩織就迴文錦如此陽臺暮雨何只有聰明蘇蕙
子更無悔過竇連波落日同騎款段遊倦依松石弄清流蓬
萊漢殿春分手一笑相逢太華秋舟中一雨掃飛蠅半脫綸
巾臥翠藤殘夢未醒牕日晚數聲柔櫓下巴陵何人把酒慰
深幽開自無聊落更愁幸有清溪三百曲不辭相送到黃州
向來松檜欣無恙坐久復聞南磬鐘隱隱修廊人語絕四山
滴瀝雪鳴風自愛新詞韻最嬌小紅低唱我吹簫曲終過盡
松陵路回首煙波十四橋夜暗歸雲遶柁牙江涵星影雁團
沙行人悵望蘇臺柳曾與吳王掃落花征帆一似白鷗輕起
揭船篷看晚晴梅子著花霜壓岸自披風帽過臨平

蘇詞注

東坡詞行憂寶瑟僵乃用漢書金日磾傳行觸寶瑟僵語解者顧引楊行密給朱延壽病目行觸柱僵有何干涉乃知註書之難東坡放翁猶不敢居有以也

胡恢書

南唐書今止傳陸游馬令二本胡恢書久不傳惟江陰赤岸李氏有之李卽忠毅公應昇之叔忘其名矣按恢金陵人夢溪筆談稱恢博物強記善篆隸韓魏公當國恢獻詩云建業關山千里遠長安風雪一家寒公憐之令篆太學石經官華州推官而卒

僧作制義

明時南京五大寺僧每季考校於禮部命題卽法華楞嚴等經其文則仿舉子制義文義優者選充僧錄等官某寺僧耳疑者曾刻其制義黃俞邵云曾見之

孟子逸語

孟子逸句有云人之所知不如人之所不知信矣見梁武帝答臣下神滅論又見釋道安教指通局又君王無好智君王無好勇勇智之過生平患禍所遭正當仁義爲本見蕭子良與孔中丞書謝廷讚維園鉛摘載之其語殊不類

法言語

法言春木之苞兮援我手之鶉兮二語全仿原壤歌狸首之斑然執女手之卷然

龍環

劉節之孔和有詩云虛堂微月影玲瓏茗粥筵中解靜聽已許
來年仍小泊未須催曉唱瓏瓏瓏瓏二字出揚子法言瓏瓏
其聲者其質玉乎則商玲瓏作商瓏玲亦何不可之有

荀子語

李廣射虎沒石飲羽荀子解蔽篇已云冥冥而行者見寢石
以爲伏虎也唐詩山風吹空林颯颯如有人荀子已云見植
林以爲後人也

舩

蜀人謂衣紐曰舩蓋方言也海鹽陸處士冰修嘉淑贈予詩有
跣足到門衣不舩之句用此谷水談林釋杜詩天子呼來不
上舩乃引方言鑿矣

劉李

中州集中如劉迎無黨之歌行李汾長源之七律皆不減唐
人及北宋大家南宋自陸務觀外無其匹敵爾時中原人才
可謂極盛非江南所及

詩僧

新城釋成楚字荆菴受五戒於法慶今居靈巘頗能小詩落
花云高枝忍別離逝水隨飄蕩雨後云青猿臨澗飲白鳥向
空翻秋日云風來夕沼綠荷敗霜落秋山黃葉多山居云險
崖旬後叅宗旨陷虎機前驗作家新霽云嵐氣千重縈嶂背
清流萬道出雲根贈奚林大師云派衍靈山第一枝無言得
髓是吾師偶然墜拂天花落絕勝空生晏坐時記之當續訪

其全云同時僧智泉者亦新城人有移竹詩云別去寒山寺
來依明月樓亦有致

詔語似詩

漢光武諸書詔最有情態西京所無沿及明章亦然光武賜
侯霸璽書云崇山幽都何可偶黃鉞一下無處所古勁絕似
漢人詩句又范書語往往有似詩者如柴門絕賓客楊震僕
妾盈紈素楊秉之類是也光武微時嘗歎曰仕宦當作執金
吾娶妻當得陰麗華亦似漢人樂府語

蟛蜞集

閩人林小眉端明崇禎癸未進士才甚雋異以伉直死獄與
余賢之同難著蟛蜞集十卷同年張給事赤菴松及其子人

中走七千里以序相屬引歐陽公序穆伯長袁石公序徐文
長爲比會予使東粵失其集聊識之俟索其本爲序之

肅府淳化帖

予記陳卓曼仙補刻肅府淳化閣帖事門人海寧陳奕禧子
文適寄所著臯蘭載筆至中述蘭帖始末甚詳采錄其略用
備參考肅府淳化閣本自莊王受封太祖賜之宋刻相傳有
鳳喙卮并憲王時洮岷道潁川張鶴鳴得李子崇本於白下
材官本於臯蘭請肅王賜帖校讎見古法帖數段久缺而茲
獨全知爲馬房光怪以前物也姑蘇溫如玉南唐張應台爲
之雙鈞鶴鳴攜之黔陽憲王乃鐫石於蘭未竟而薨世子識
鉉卒業於萬曆辛酉先後七年其初搨用太史紙程君房墨

人間難得搨工間有私購者直五十千刻用富平石一百四十四葉二百五十三藏府東書園殿鼎革時石幾淪缺順治甲午洮岷道揚州陳卓補刻復成全璧然神明不備視初搨徑庭矣乙卯平涼逆焰及蘭靖逆奮威二將軍自河西來軍於龍尾臯蘭之間攻城不下賊欲破石爲礮僞知州徐某力救得免今移置州學有張尚書鶴鳴王尚書鐸憲王父子四跋云

進西岳賦表

杜甫進封西岳賦表有云維岳授陛下元弼克生司空按舊書紀天寶九載正月羣臣請封西岳從之二月辛亥西岳廟災制停封二月右相楊國忠守司空天雨黃土霑於朝服杜

所謂元弼司空謂國忠也國忠以椒房進夤緣三公天下知其非據而甫獨引大雅甫申之詞以諛之可謂無恥他日作麗人行又云慎莫近前丞相嗔乃自爲矛盾杜固詩史其人品未可知顧自許稷契亦妄矣

蔡狀元詩

庚戌狀元蔡崑暘啓傳公車過淮安謁山陽令邵某邵其鄉人也批其名刺云查明回報蔡怒而去至京遂狀元及第題一絕句於扇寄邵云去冬風雪上長安舉世誰憐范叔寒寄語山陽賢令尹查名須向榜頭看蔡後官春坊中允假歸卒

指掌圖

東坡先生指掌圖於五代之君書法各異於梁曰梁太祖朱

溫於唐曰後唐莊宗諱某於晉周曰晉高祖姓石氏名某周太祖姓郭氏名某字仲文於漢則曰漢高祖睿文聖武昭肅皇帝姓劉氏名某豈非以五代惟後唐及漢得國差正而異其書法耶郭周七國條下書放鍾離謨歸江南按史鍾離謨傳但云其先會稽人不言本姓鍾離離字豈誤書抑衍文耶

羅鄂州

宋羅鄂州願古文南渡後第一爲朱文公所推重其爾雅翼後序通篇用韻尤屬奇翺宋文憲公序鄂州小集因效其體亦韓文公志樊紹述之意然奇崛出鄂州下矣

二內禪頌

宋高宗紹興內禪羅願端良作帝統孝宗淳熙內禪王子後

才臣作內禪頌皆仿典引貞符之體帝統有云神器大寶一朝可付十世必復畱無嫌久報無移德俾我太宗之志獲明於二百載之後又云選世至七復遇厥聖還之於宸極大統以正頌中有諷蓋深致不滿太宗之意此文似在王作之右近梁谿顧修遠宸撰宋文選止取王頌而不載帝統豈未覩鄂州文集耶

避諱當改正

古今避諱有沿襲不改者如秦始皇諱政以正月爲征月晉避司馬昭諱樂府以昭君爲明君唐祖諱虎改虎林爲武林呂后諱雉以雉爲野鷄武后諱曩以詔書爲制書鮑照爲鮑昭楊行密據揚州州人改蜜爲蜂糖錢元瓘據浙浙人改一

貫爲一千之類皆當改正

西施

程良孺讀書考定云管子小稱篇毛嬙西施天下之美人也
自管子至吳越二百一十三年矣如果一西施不應先及

相鼠鼯鼠

詩相鼠孫奕云相地名陸璣云河東有大鼠能人立交前兩
脚於頭上跳舞善鳴按地志相州與河東相鄰荀子鼯鼠五
技而窮本草廣雅皆謂螻蛄一名鼯鼠易晉如鼯鼠孔穎達
正義引蔡邕勸學篇云鼯鼠五能不成一技荀子云竝爲螻
蛄也

蜀恙泥妍媼

爾雅釋山獨者蜀蜀虫名好獨行無恙恙亦虫名風俗通云
恙毒虫也春傷人神異經北大荒中有獸咋人則病名曰恙
恙恙也如泥泥亦虫名妍媼皆虫名妍螢類身有光采崙形
蠢蠢然也

魏南陽

畢萬之魏今蒲州之永樂鎮非大名元城也韓愈之南陽今
修武之南陽非南陽鄧州也漢書地理志修武應劭曰晉始
啓南陽今南陽城是也秦昭紀魏入南陽以和白起傳攻南
陽太行道絕之張儀傳魏絕南陽皆是

鄜鄜

菽園雜記鄜有二音一則盱切一才何切才何者縣屬沛國

蕭何初封邑則盱者縣屬南陽蕭何子孫所封也讀書考定蕭何封鄜侯今世家作鄮侯字相似之誤也鄜才何切孟堅泗水亭碑文昌四友漢有蕭何敘功第一受封於鄜古今字韻全書鄜鄮二字竝見十五歌注云鄜縣名在譙郡或作鄮鄮本音嗟前漢書功臣表鄮直音贊史記功臣侯年表并同索隱曰鄮縣在沛方以智通雅云當時在南陽今在襄陽之光化者蕭何封邑也沛縣之鄮本作鄜音嗟今在考城縣漢地理志載南陽鄮縣侯國不言沛之鄜侯國非其明驗乎升菴弱侯定以沛鄜爲何封邑而云師古無據者謬也按鄜鄮兩音自是兩字菽園混而一之讀書考定主沛之鄜與楊焦旨同以何起沛封必近之而以班碑爲據通雅則以師古注

爲據南陽蕭何封邑音鄮本春秋陰國唐爲懷州陰城縣有何廟高后封何夫人同爲鄮侯小子延爲筑陽侯鄮與筑陽同隸南陽郡也二說正相刺謬至沛郡之鄮應劭音嗟師古曰此縣本爲鄜應音是也中古以來借鄮字爲之耳讀皆爲鄜而莽呼爲贊治則此縣亦有鄮音然功臣表元符三年共侯慶以何曾孫紹封鄮不言別是一鄮菽園之說未知何據又按劉肅唐世說云凡封功臣多就本土張良封畱是爲成例按班固泗州亭碑云漢書班氏所修泗州碑孟堅所作何須穿鑿更制別音此駁師古注與楊焦二說同

呂太一

杜詩自平宮中呂太一黃鶴注云當作中官呂太一錢牧翁

注舊書廣德元年宦官市舶使呂太一逐廣南節度使張休
又韋倫傳代宗卽位中官呂太一於嶺南矯詔募兵爲亂按
劉肅唐世說呂太一拜監察御史裏行詠院中叢竹以寄意
曰擢擢當軒竹青青重歲寒心貞徒見賞籜小未成竿後遷
戶部員外牒吏部云當須簡要清通何必監籬插棘又按唐
會要魏知古嘗薦洹水縣令呂太一又張嘉貞薦呂太一及
苗延嗣等時號令君四雋此又一呂太一也皆與中官無涉

王萃

歷城秀才王萃字秋史少年能詩頗清拔絕俗常有亂泉聲
裏誰通屐黃葉林間自著書黃葉下時牛背晚青山缺處酒
人行之句萃師田中丞漪亭雯而友吳徵士天章雯丙寅秋

寄詩於予予偶以書寓巡撫張中丞南溟鵬言萃之才中丞
特召見引之客座且贈金焉萃之才中丞之誼皆塵中所少
故記之

月泉吟社

宋末浦江吳渭倡月泉吟社賦田園雜興近體詩名士謝翱
輩第其高下詩傳者六十人清新尖刻別自一家予幼於外
祖鄒平孫公家見古刊本後始見琴川毛氏本常編和之竊
謂臯羽所品高下未盡當意因戲爲易置次第如左○春日
田園雜興○第一名子進本名魏新之號石川第二名魏子大梁必大第
三名全泉翁全璧字君玉第四名山南隱逸劉應龜字元益第五名躡雲
翁合老仲嘉第六名仙村人第七名方賞方德麟號藏六第八名高宇梁相

字必大 第九名俞自得第十名槐臆居士黃景昌十一名東湖散

人十二名徐端甫十三名仇近村仇遠字仁近十四名陳希邵陳舜

道十五名子直魏石川十六名司馬澄翁馮澄字澄翁十七名陳緯

孫何教十八名聞人仲伯陳希聲十九名君瑞二十名田起東劉

鈞號二十一名羅公福連文鳳號應山原第一名

谷音

谷音二卷元清江杜本清碧所輯其人皆節俠跣弛之士詩亦岸異可喜常疑清碧自撰託名於人及得其清江碧嶂集觀之殊庸庸無足取與所輯迥不類谷音吾友施愚山爲湖西監司時亦嘗刻於臨江

韋蘇州

李元賓集有代人上韋蘇州書二篇刺韋褊急躁露殊不類其爲人今錄於左月日於法司上書郎中閣下彝不耽書嗜酒已至於老東西南北無立錐之地竊以閣下有經濟之器因敷小人直顛之性非敢失色於左右僥求於去就不圖行絀時禁坐貽伊戚惶怖無暇繫維不安仰天椎心收血續淚所言奔鹿觸網飛蛾蹈火顛蹙靡排彝何以堪彝知過矣舉家十口兒女幼弱寺中僑寄目下絕粒閣下錮彝在此令吏推責反覆憂難詞理俱屈衰髮一夕如經十秋素來無業只慣飲博罔曾負累以至訊問事過奇喘無禍不有且彝於天下何異株塊比於閣下累螻蟻如國家之事肉食者謀雖鞭之長胡及馬腹况中籌之子如何敢及早聞閣下清節玉立

洪量海納軍謀在握文藻盈帙中外騰口聲歸其高彝是用
微誠庶彼知己不測閣下以言罪之嘗聞不以言廢人
閣下何必取威於懦夫而後行令且明主有誹謗之木諸侯
有鄉校之議今主上何媿於禹閣下何短於鄭卿伏惟念彝
之失寬彝之責使得 便當鉗口匍匐鈴下以救前非則
仗諸忠信越境不敢雷也彝死罪死罪又代李圖南上蘇州
韋使君論戴察書文多不具錄

夢山詩

海豐楊夢山宮保太宰魏有存家稿八卷五言最簡古得陶
體明人所少予喜其一絕云前年視我山中病落日獨騎驄
馬來記得任家亭子上連翹花發共啣杯予在京師日曾選

訂其集爲三卷謝員外方山重刻之

黃夫人詩

楊升菴夫人黃寄外詩曰歸日歸愁歲暮其雨其雨怨朝陽
乃黃魯直答初和甫詩句也見豫章外集詩云君吟春風花
草香我愛春夜璧月涼美人美人隔湘水其雨其雨怨朝陽
蘭荃盈懷報瓊玖冠纓自潔非滄浪道人四十心如水那復
夢爲蝴蝶狂

隄糜

隄糜墨名後漢書西羌傳有隄糜相曹鳳注云隄糜屬右扶
風今汧陽縣也

孫豹人詩

孫豹人枝遊焦山中流風浪人作舟人失色孫長嘯詠詩云
風起中流浪打船秦人失色海雲邊也知賦命元窮薄尚欲
西歸太華眠孫三原人流寓江都

遼宮詞

萊州趙伯濬士嘗作遼宮詞百首可與周憲王元宮詞頡頏
伯濬隱居登之松椒山躬耕著書去家五百里終身不歸著
皇綱錄建文年譜

平陵城

後山叢談云齊之龍山鎮有平陸故城高五丈四方五里附
城有走馬臺其高半之闊五之三上下如一其西與南則在
內東北則在外莫曉其理今平陵城故址尚在在歷城章丘
界所謂走馬臺者不可復識矣坡公詩濟南春好雪初晴行
到龍山馬足輕卽此地孟子之平陸則在今汶上縣此城本
東平陵唐齊王祐反縣人不從太宗嘉之詔改縣名爲全節
後山云平陸亦訛也

中南草堂圖

程幼洪邑邸中閱宣和御府所藏摩詰終南草堂圖上方橫
書王維終南 峯草堂圖九字闕爲道君御書倪元鎮題云
予讀岑參集有歸終南草堂詩今摩詰之寫是圖也豈其贈
別之作耶大抵高賢達士於謝政歸閑之際不能無詠歌圖
繪以贈之昔盧鴻有嵩山草堂十圖亦猶是也故徽廟標書
以便後之覽者此幅向爲杜南谷先生所藏予得之日夕展

對不惟諸品爲之減色而吾儕之進取深有藉於斯圖矣黃
子久題云右丞此圖與雪谿捕魚二卷同一筆致而秀婉過
之豈其後先之分耶又梅道人吳仲圭紫芝俞和詩各一篇

潞王琴

故明潞藩敬一主人風尚高雅嘗造琴三千張予猶見長安
市上售其一有隸書中和二字又常仿宣和博古圖式造銅
器數千枚瘞地中予昔在金陵登弘濟寺見臨江石壁上刻
其畫蘭極工

焦山鼎詩

焦山海雲堂有古鼎一高一尺三寸二分腹徑一尺五寸八
分口徑一尺四寸五分耳高三寸闊四寸二分足六寸一分

深入寸二分腹有銘其詞曰惟九月既望甲戌王及於周宓

子于圖室司徒疑治南仲佑 惠 立中庭王呼史受冊

命 惠曰官司治王 側 作錫汝元衣束帶戈瑀戟縞鞞

彤矢鏐 鑿旂世惠敢對揚天子丕顯敷休用作尊鼎用享

于 烈考用周簋壽萬年子孫永寶用此予兄弟手搗屬新

安程穆倩遂譯本凡蝕二字疑六字闕九字秀水朱竹垞彝

云其曰立中庭按毛伯敦銘文亦有之薛尚功釋爲立而楊

南仲謂古立位同字古文春秋書公卽位爲公卽立則是銘

立字亦當讀作位也鼎故京口某公家物分宜枋國時聞此

鼎欲之某公不卽獻因嫁禍焉鼎遂入嚴氏嚴氏敗鼎復歸

江南因置焦山寺中家兄摹爲圖賦長歌紀之予亦有五言

古詩三十韻記事汪鈍翁 琬序之

誌公碑

常白山醴泉寺誌公碑唐開元乙卯立文作齊梁體可辨者十之三書法圓勁在歐虞間每行凡七十九字其下多斷齧不存其碑陰乃誌公像也碑可辨者錄於此

大唐齊州章丘縣常白山醴泉寺誌公之碑

闕二京大薦福寺奉敕闕一慶闕一綴文沙門玄傘闕五

薦福寺闕二翻經院校勘沙門正智寺都維闕一僧道寂

建此寺闕三

闕一曇花未出庸詎知寂滅之名覺日猶闕一曷嘗識苦空

之相闕一夫金儀下降舍靈闕一淨月之光寶教旁流闕四

雲之潤三車闕一駕闕二十化工闕三香不息所以化身周

流於別土神闕三於塵沙或十大聲聞駐形闕二一方菩薩

納景涼臺觀闕一背嶺以宣慈清辨起闕二十未掩白足闕二

字佛法之闕三月闕一咸闕一王城之舍蓋闕一生闕一道

闕一境發闕一若不人闕一具闕四諦幢高闕一者與今此

醴泉寺者是宋齊闕二十經文師即闕二身之菩薩闕一遊

神境來屆茲山棲託巘阿聿脩禪寂以為此地立武之分青

龍闕四首以開疆據天齊而劃野却闕二十尚父之闕一居

九合一匡齊桓公之霸國爾其常白山者廼摩天闕一地晻

映蔽虧抱泉石以娛神出雲霞而養性山毛地髮名花將軟

草連芳闕二十人闕二繪闕二形勝闕二招提自後七級崇

圖闕一起舍佉之才五層闕一重標戰勝之門海目山亭

妙相殫於變態虹梁鳥革大壯闕二綵畫闕二塵凡闕二香

水調八解之闕一風闕一五音之說息心之輩見流注

以超昇迴面之徒仰幽關而悟入時逢闕二代屬闕三十金

林玉闕一寥落幽巖我國家灌頂四天纂圖千帝以佛乘為

為馬用道品為城郭八方起塔闕二道形九闕一聚鹽情殷

誠四履闕二仰釋天而矯首又屬中宗孝和皇帝龍興漢道

入天經闕二十周法界去景龍二年歲次子爰有齊州正

智寺都維僧仁萬俗姓李字道寂慨茲墮墜抗表闕一宗天

鑒至誠特賜名闕三十否而還泰山靈掩以重開法俗歡康

人神一悅初師之行進表也夢乘船上山及翌闕一赴朝所

引無礙豈非興廢闕一定通闕一懸期闕二十倣裝東上將

州闕二三藏義淨法師各代高僧天下重德先奉敕於

大薦福寺闕三律以闕六勝緣闕一城在東倍增闕二十四

降靈五闕一德闕一人天之表名揚宇宙之間聖闕一

神功叵測及將命星發載達京闕十時有闕三十身

輟絃歌歲闕三即以二月八日親率合境老幼大會新

寺表慶天恩又於闕二之闕一尊卑就列鴈行齊聽闕二十

忽見有醴泉闕四三四尺深淺三尺餘色淨味甘爰符瑞典

挹酌同飲咸覺蠲疴豈不以闕一福闕一圓三靈允答光揚

寶闕一滋液金場故闕二十上聞闕二垂感有敕改名為醴

寶闕一滋液金場故闕二十上聞闕二垂感有敕改名為醴

寶闕一滋液金場故闕二十上聞闕二垂感有敕改名為醴

寶闕一滋液金場故闕二十上聞闕二垂感有敕改名為醴

寺仍更抽入冊九僧住持行道自玄波再委王題重開日殿

赫而闕一昇月宮華而桂滿若乃闕二十海精勤以齊深戒

月澄空闕二密霧禪燈焰室巧避輕風濯闕二之龍闕一洗

毗闕一之鳥眼長袂五住遠効四心刷闕一鴈以飛雲響闕二

十七捨生之地續桂闕二有情根軌足方闕一鳴金鼓闕一

功不朽流福無窮斯竝先帝之本願莊嚴法師幽贊威神之

所致也又師遊戲生死示闕二十儼如親對即平時所將黑

犬亦繁具闕二厥闕二無願不從迺至有患心痛者但取廟

前少土和水服之應時便愈遺形是託神靈保持由是闕二

梁寺史傳師木俗姓朱氏金城人也少出家闕二道林寺

僧儉法師為和上業存禪闕一宋太始初漸彰異迹居止不

定飲食無時長髮跣足每闕二十詞同讖記言不虛發應驗

如神或闕一視通於北闕一分形遍於南國奇怪忽恍不可

殫論以天監十三年歲次甲午十二月八日闕二十相奄然

示終時有異香闕二芬馥特赦厚加殯送葬於鍾山獨龍阜

仍於墓所闕一開善精舍敕陸倕製銘於冢內王筠勒碑於

寺陰闕二十生及其去也以精靈度物哀憐庶類福祚皇王

且彼託鍾山此依常白彼葬龍阜此闕一龍臺前王挹風建

開善之墳闕一後帝傾闕二醴闕二十至今大唐太極元年

歲次壬子皇帝御天下之三載凡一百九十九年化化之緣

古今無盡明明之德日月彌新其所變現之梗概闕二十之

夥不可備載當嘉聲上徹先帝令左臺監察御史宋務先親
 加檢覆闕二十八字八正所以知歸一屬闕一字緣獲未曾有闕二字
 復命倍沃天心刺史楊元禧分符北極露冕東藩闕一字雨逐
 於行車仁風隨於轉扇黃金闕二十八字追鳥跡於上乘想闕六字
 繩寶地闕一字動天宮薦瑞香園延光帝載縣丞主簿縣尉闕一字
 舍闕四十三字羣物揚舲彼岸錄事闕二字鄉闕一字等門滋蘭闕四
 字闕三字茅忠信滿於州閭因果闕一字於闕四字虔命闕一字奉闕三十一
 九地荷於津通貝樹披春帝王之遺文秩矣金闕三字諸佛之
 正道通矣迷津闕一字路菩薩運載之乘行矣闕八之闕二十
 况立天大造充溢於盡空淨域鴻緣牢籠於無外昔迦闕三字
 如來垂讚歎之闕一字彌勒當闕三字表歌揚之偈若稽古訓式

樹闕一字碑仍於闕二十銘曰義天兆昧優花未披但迷五蘊
 孰辨三伊闕二字火宅耀我金儀神足繼軌闕二字揚闕一字
 有闕一字成觀方闕二字戴表靈闕二字開闕二十綱燬我寶地壞
 我金場花殘鷺沼煙輟龍香霞標歇滅石徑荒涼其萬寓乘
 皇千齡篡帝日月連闕一字飛行闕一字契闕一字念新闕五高闕二
 字闕十八精標五門玉墀椒感銀闕一字輿存其五欲赴天泉闕一字規
 國德寄誠墳廟傳詞翰墨瑞醴通流嘉祥允塞重光佛闕二字
 題宸極其六紺軒加闕二十沙其七先帝聖靈聿資神境冥扶默
 贊分形散影既墓彼山又墳茲嶺寶鐸雙振金繩共炳化闕三
 字闕一真身永永其八功闕一字泉闕五天闕二十宣聞諸典故鐫金
 樓玉道該緇素式讚王猷闕一字淨度勒像賢劫刊碑覺路其十

開元三年歲次乙卯二月己酉朔十五日癸亥下闕

米太僕研山

米太僕友石萬鍾家藏一研山有七十二峯洞壑奇絕每天欲雨則水出欲霽則先燥太僕以五百金購之明末流寇入京師米氏奔迸以古器數籠寄親戚家此物遂爲一士夫所得又寶一風字硯太僕知六合縣時嘗入覲北京往返兩月餘硯墨猶未燥也康熙戊午夏公孫紫來漢知長葛縣行取入都出硯示予爲說如此紫來今官翰林待

